



MAJLIS PERBANDARAN SEBERANG PERAI

TEKS UCAPAN

YBHG. DATO' Sr HAJI ROZALI BIN HAJI MOHAMUD
YANG DIPERTUA
MAJLIS PERBANDARAN SEBERANG PERAI

SEMPENA

PROGRAM RAKAN BM "BALIK KAMPUNG"
KARNIVAL KLAN (CLAM) SEBERANG PERAI

TARIKH / MASA / TEMPAT
02 FEBRUARI 2019 (SABTU)
7.00 PETANG

TINGKAT 1
PASAR AWAM BUKIT MERTAJAM

Terima kasih Saudara/Saudari Pengacara Majlis

Yang Berhormat Tuan Steven Sim Chee Keong

Timbalan Menteri Belia dan Sukan
Merangkap Ahli Parlimen Bukit Mertajam

Yang Berhormat Puan Heng Lee Lee

Ahli Dewan Undangan Negeri Kawasan Berapit

Yang Berhormat Tuan Lee Khai Loon

Ahli Dewan Undangan Negeri Kawasan Machang Bubuk

Yang Dihormati Ahli-Ahli Majlis

Majlis Perbandaran Seberang Perai

Yang Berusaha Puan Ir. Hjh Rosnani Binti Hj Mahmod

Setiausaha Perbandaran MPSP

Yang Berusaha Encik Marc Teh Bak Eam

Pengerusi Penganjur Program Rakan BM “Balik Kampung” Karnival Clan Seberang Perai

Ketua-Ketua Jabatan

Majlis Perbandaran Seberang Perai

Pegawai-Pegawai Kanan

Majlis Perbandaran Seberang Perai

Rakan-Rakan Media

Tuan-Tuan Dan Puan-Puan Yang Dihormati Sekalian

Assalamualaikum warahmatullahi wabarakatuh,

Selamat petang dan salam sejahtera,

Alhamdulillah, bersyukur kepada tuhan kerana dengan izin dan limpah kurnianya dapat kita bersama-sama pada hari ini di dalam Program Rakan BM “Balik Kampung” Karnival Klan (*Clan*) Seberang Perai anjuran bersama Rakan BM dan pertubuhan Keturunan Klan Pemuda-Pemudi Di Seberang Perai serta Majlis Perbandaran Seberang Perai (MPSP)

Terlebih dahulu saya ingin mengucapkan ribuan terima kasih kepada Yang Berhormat Tuan Steven Sim Chee Keong, Timbalan Menteri Belia dan Sukan; Yang Berhormat Puan Heng Lee Lee, Ahli Dewan Undangan Negeri Kawasan Berapit; Ahli-Ahli Majlis MPSP; Puan Setiausaha Perbandaran; Ketua-Ketua Jabatan serta kakitangan MPSP; dan yang terutamanya para pemimpin tempatan, peniaga dan komuniti Bandar Bukit Mertajam yang hadir untuk menjayakan program pada petang ini.

Saya juga ingin mengambil kesempatan ini untuk mengucapkan tahniah dan syabas kepada Yang Berusaha Encik Marc Teh Bak Eam, Pengerusi Penganjur Program Rakan BM “Balik Kampung” Karnival Clan Seberang Perai dan pasukan beliau yang telah berjaya menganjurkan program ini yang telah berjalan dari 1 Februari 2019 sehingga hari ini.

Yang Berhormat-Yang Berhormat, Tuan-Tuan dan Puan-Puan Yang Dihormati Sekalian,

Bukit Mertajam merupakan satu bandar kecil yang bersejarah dan melahirkan anak-anak yang telah melangkaui beberapa generasi. Program Rakan BM Balik Kampung Karnival Klan (*Clan*) Seberang Perai ini dianjurkan untuk mempromosikan keindahan kesenian dan kebudayaan Bukit Mertajam dalam memperkenalkan budaya tradisional kepada komuniti Bukit Mertajam dan pengunjung-pengunjung di Bukit Mertajam baik dalam negeri mahupun luar negeri. Program ini bertujuan memperkenalkan budaya tradisional kaum Cina di Seberang Perai mengikut "*surname*" atau nama keluarga atau klan (*clan*) yang bersejarah sejak zaman nenek moyang terdahulu.

Program dimulakan pada 1 Februari 2019 sehingga 2 Februari 2019. Pelbagai aktiviti dijalankan seperti seminar, pameran dan persembahan kebudayaan yang memperkenalkan Klan (*Clan*) Cina dan adat resam serta kesenian agar ianya tidak lapuk ditelan zaman. Selain itu, program ini dapat memupuk semangat cintakan kebudayaan dan kesenian pelbagai kaum yang terdapat di negara ini agar generasi muda dapat mengamalkan budaya dan kesenian yang ada pada masa ini. Ianya juga adalah untuk menggalakkan pemuda-pemudi untuk melibatkan diri dalam aktiviti yang

bersifat non-akademik mahupun yang bersifat akademik untuk melahirkan pemuda-pemudi yang bersifat kreatif.

Yang Berhormat-Yang Berhormat, Tuan-Tuan dan Puan-Puan Yang Dihormati Sekalian,

Untuk makluman, MPSP telah menandatangani satu perjanjian persefahaman (MOU) pada 20 Oktober 2015 bersama Bandar Yokohama, Jepun, *the Japan International Cooperation Agency (JICA); Yokohama City University*; Universiti Sains Malaysia dan Jawatankuasa Persahabatan “*Yokohama-Seberang Perai Urban Development*”. Projek yang dikenali sebagai “*The Project to Create Townscape / Communities for Seberang Perai Municipal Council (Malaysia) that Ascend Its History and Nature*” dan merupakan salah satu projek di bawah program kerjasama JICA iaitu “*grassroots projects of technical cooperation*”.

Projek kerjasama ini melibatkan kajian bagi tempoh selama tiga (3) tahun dan telah tamat pada Disember 2018. Objektif utama kajian ini adalah untuk meremajakan semula Bandar Bukit Mertajam dengan memelihara nilai warisan dan identiti tempatan di samping mewujudkan persekitaran yang lebih mesra dan terancang untuk penduduk. Pengalaman

dan kepakaran daripada pihak Yokohama dan Universiti dimanfaatkan dengan pembentukan Pasukan Kerja Bandar Bukit Mertajam yang melibatkan pegawai-pegawai MPSP, pihak USM dan Jawatankuasa Persahabatan “*Yokohama-Seberang Perai Urban Development*”.

Beberapa siri latihan teknikal telah dijalankan di antara Pasukan Kerja Bukit Mertajam bersama Pasukan Yokohama bermula Januari 2016 disertai beberapa siri *community engagement* telah diadakan bersama komuniti Bandar Bukit Mertajam. Berdasarkan hasil perbincangan teknikal dan pandangan yang diperolehi daripada penduduk Bandar Bukit Mertajam. Hasil daripada Projek ‘*Urban Renewal of Bandar Bukit Mertajam*’ ini telah berjaya melaksanakan lima (5) projek *pilot* di dalam Bandar Bukit Mertajam. Projek tersebut adalah;

I. **Pemasangan papan informasi Bandar Bukit Mertajam.**

Pemasangan papan informasi ini telah dilaksanakan di tiga (3) lokasi yang telah dikenalpasti menjadi tempat tumpuan umum iaitu di persimpangan masuk Jalan Pasar, di hadapan Pasar Awam Bukit Mertajam dan di lorong sisi antara Jalan Datuk Ooh Choi Cheng dan Jalan Che Bee Nor. Papan informasi ini akan menjadi medium maklumat kepada orang ramai akan sejarah bandar Bukit Mertajam dan tempat-tempat menarik di dalam Bandar Bukit Mertajam.

II. Pemasangan plat di bangunan yang bernilai warisan.

Pemasangan plat di bangunan yang mempunyai nilai warisan ini telah dilaksanakan di empat (4) buah bangunan yang telah dikenalpasti iaitu rumah kediaman keluarga Ketua Menteri Pulau Pinang Pertama iaitu Tan Sri Wong Pow Nee, Bangunan Persatuan Hung Kung Bukit Mertajam, Kedai Tembikar Tradisional dan Bangunan Kediaman berusia lebih 100 tahun. Pemasangan plat ini dilihat sebagai satu langkah penting bagi mengiktiraf bangunan bernilai warisan yang sedia ada di dalam Bandar Bukit Mertajam. Langkah ini juga dapat menggalakkan pemunya bangunan yang mempunyai nilai warisan ini memelihara dan memulihara bangunan-bangunan ini agar dapat dimanfaatkan untuk pemajuan bandar dan pengekalan warisan.

III. Buku Panduan Bukit Mertajam

Buku Panduan Bukit Mertajam telah diterbitkan dalam bulan Disember 2018 untuk dijadikan panduan dalam mempromosikan Bandar Bukit Mertajam sebagai bandar yang mempunyai pelbagai identiti setempat yang perlu dipelihara. Bandar ini mempunyai kekuatan ekonomi, sosial dan sejarah yang tersendiri dan penghasilan buku panduan ini dapat menyampaikan informasi berkaitan bandar kepada orang ramai termasuk pelancong apabila ditempatkan di beberapa tempat strategik seperti pusat pelancongan, hotel dan lapangan terbang.

IV. Menaik taraf imej tangga Pasar Awam Bukit Mertajam.

Pasar Awam Bukit Mertajam merupakan salah satu tarikan utama yang terdapat di Bandar Bukit Mertajam. Pasar ini merupakan satu pasar lama yang masih kekal sehingga ke hari ini. Melalui hasil kajian kerjasama ini telah berjaya mengekalkan Tingkat 1 Pasar Awam ini setelah terbakar pada tahun 2014. Kerja-kerja pengukuhan Tingkat 1 Pasar Awam telah berjaya dilaksanakan dan siap pada 17 Julai 2018 dengan kos sebanyak RM819,886.52. Ruang Tingkat 1 Pasar Awam ini akan dimanfaatkan untuk kegunaan awam dan komuniti Bandar Bukit Mertajam. Projek menaiktaraf imej di Tangga Pasar Awam yang siap dilaksanakan pada 12 Disember 2018, dilihat sebagai langkah meningkatkan imej Pasar Awam ini secara khususnya dan menjadi tarikan di dalam Bandar Bukit Mertajam secara amnya. Projek ini dijangka akan menarik ramai pengunjung setempat dan luar daripada Bukit Mertajam di samping mempromosikan ruang awam di tingkat 1.

V. Pemasangan ‘*sunshade*’ di lorong sisi antara Jalan Datuk Ooh Choi Cheng dan Jalan Che Bee Nor.

Pemasangan ‘*sunshade*’ di lorong sisi ini bertujuan bagi menaiktaraf imej lorong sisi di dalam Bandar Bukit Mertajam dalam usaha mewujudkan persekitaran yang menarik dan selamat kepada pejalan kaki. Projek menaiktaraf lorong sisi ini siap dilaksanakan pada 12 Disember 2018 dan adalah merupakan salah satu langkah dalam

menambahkan ruang awam kepada penduduk setempat. Lorong ini hanya akan digunakan oleh pejalan kaki dan kerja-kerja pengindahan akan diteruskan dengan kerjasama erat MPSP dan komuniti pada masa hadapan.

Melalui kajian berkaitan trafik dan lalulintas dan juga maklumbalas daripada komuniti serta agensi teknikal sepanjang Projek '*Urban Renewal of Bukit Mertajam*', satu buku panduan bertajuk *Bukit Mertajam UD Guidelines* akan dihasilkan. Buku panduan ini dapat membantu MPSP merancang tindakan penyelesaian bagi pembangunan bangunan, kesesakan lalulintas, kekurangan tempat letak kereta, akses pejalan kaki serta pembangunan ruang awam bagi jangka masa pendek dan jangka masa panjang.

Cadangan projek-projek ini mengambil kira pandangan daripada pemimpin dan komuniti setempat. Selain itu, aktiviti kaji selidik dan lain-lain bentuk *community engagement* akan terus dilaksanakan dari masa ke semasa bagi memastikan pembangunan semula Bandar Bukit Mertajam mengambil kira pandangan dan kepentingan komuniti. Projek Rekabentuk Bandar Bukit Mertajam ini turut menggalakkan penyertaan dalam bentuk idea dan *Corporate Social Responsibility* (CSR) daripada pihak swasta dan individu bagi bersama-sama MPSP merealisasikannya. Setakat ini MPSP

telah menerima beberapa tawaran daripada beberapa pihak swasta dan Badan Antarabangsa bagi bersama-sama melaksanakan projek-projek ini. MPSP turut ingin menjemput pihak swasta dan individu yang ingin bersama-sama membangunkan semula Bandar Bukit Mertajam dan menyokong inisiatif 7Ps (*People, Public, Private, Philanthropy, Philosopher, Planet Partnership*).

Yang Berhormat-Yang Berhormat, Tuan-Tuan dan Puan-Puan Yang Dihormati Sekalian,

Saya yakin penganjuran program seperti ini adalah satu usaha untuk mengenali sejarah perkembangan dan kebudayaan setiap klan di Seberang Perai yang setersunya memupuk semangat perpaduan, toleransi beragama dan keharmonian antara klan dan kaum.

Marilah kita bertekad untuk memperbaharui diri kita dan melangkah ke arah kebaikan, khususnya dalam perhubungan kita antara satu sama lain. Jika kita semua, tanpa mengira kaum agama dan bangsa, mengambil langkah ini, pasti, hubungan kita antara satu sama lain akan lebih erat dan perpaduan yang menjadi lambang kejayaan kita akan terus teguh dan kukuh demi menjamin masa depan negara kita. Oleh itu, usaha seperti ini

perlu diketengahkan untuk mencapai “*Seberang Perai Resilient, Inklusif, Hijau Kompetitif dan Bandar Pintar Dipacu oleh Teknologi*”.

Majlis Perbandaran Seberang Perai (MPSP) juga komited untuk melaksanakan wawasan Negeri Pulau Pinang yang dinyatakan dalam *Penang 2030* (Pulau Pinang 2030), iaitu “*A Family-Focused Green and Smart State*” (Pulau Pinang Pintar, Hijau dan Mesra Keluarga). Wawasan *Penang 2030* adalah merupakan suatu gagasan berwawasan, realistik, praktikal dan berpaksikan rakyat dan memberi tumpuan kepada kepada empat (4) objektif utama iaitu meningkatkan taraf hidup serta kualiti hidup penduduk; mengembangkan saiz ekonomi demi meningkatkan pendapatan isi rumah; memperkasa rakyat demi mengukuhkan sistem masyarakat sivil dan pelaburan Kerajaan Negeri dalam pembangunan alam semula jadi agar lebih berdaya tahan.

Saya menyeru kepada para hadirin sekalian bersama-sama mengambil bahagian serta memberi pandangan dan cadangan agar MPSP dapat memberikan perkhidmatan yang berkualiti serta dapat membangunkan Bandar Bukit Mertajam mengikut kepada acuan dan kehendak warga Bukit Mertajam khususnya dan warga Seberang Perai amnya.

Sekali lagi saya ingin mengucapkan syabas dan tahniah kepada Rakan BM dan rakan penganjur kerana telah berjaya menganjurkan Program Rakan BM “Balik Kampung” Karnival Clan Seberang Perai. Saya juga ingin mengucapkan ribuan terima kasih kepada hadirin yang hadir bagi menjayakan dan memeriahkan program pada hari ini. Kepada semua kaum Cina, saya ucapkan Selamat Tahun Baru Cina dengan harapan agar tahun ini akan membawa pembaharuan yang lebih baik.

Sekian,

***Wabillahi Taufik Wal Hidayah, Wassalamualaikum Warahmatullahi
Wabarakatuh.***

Terima kasih.